



Iohannes Iacobus ex nobili familia Kūenorum
in Tirolensi comitatu natus est, anno Christi mil-
lesimo quingentesimo decimoseptimo. Is optimis
præceptoribus commendatus, à pueris operam li-
teris dedit, & earum mediocrem sibi cognitionem
acquisiuit. Accedebat & naturalis prudentia, &
morum castitas. Itaq; cum is sese Brixiam contulis-
set, atque sacris incumberet, eius collegij Decanus
constitutus fuit. Cum ibi magna laude uiueret, atq;
interim Michael Archiepiscopus Salisburgensis
mortuus esset, hic Iohannes Iacobus omnium uo-
tis in eius locum substitutus fuit, Anno millesimo
quingentesimo sexagesimo. Eam dignitatem is su-

scepit, atq; prouinciam commissam optimè administrauit. Itaq; Ferdinando
Imperatori gratissimus extitit, qui etiam de rebus arduis sæpius cum eo con-
tulit. Est ille procero corpore & liberali facie egregius princeps, præterea lite-
rarum unicus amator. Itaq; cum ei opus meum primum de Viris illustribus
dedicatum obtulissem, me summa humanitate excepit, & liberaliter dimisit,
anno 1565. quo etiam tempore ille rebus adhuc præfuit, & subditis gratissimus
extitit. Anon.